



UPA16/20  
12. april 2016  
Aqqaluaq B. Egede

**Siunnersuut uunga: Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaat nr. xx, xx.xx.xxx 2016-imersoq.**  
(Aningaasaqarnermut Aatsitassanullu Naalakkersuisoq)

Nunatsinni aningaasarsiornikkut aaqqissuussinerit nutarterinerillu pingaaruteqarput, atugartuussutsikkut siuarsarnissaq kisiat eqqarsaatiginagu aammali aningaasarsiornikkut isasoorutaasinnaasut pinngitsoortinniarlugit. Inuit Ataqatigiit siunertaraarput kommunit aammalu Namminersorlutik Oqartussat inuiaqatigiit aningaasarsiornikkut tunngavigissaar-tuunerannut sinaakkutissiilluartuussasut inuussutissarsiuteqarnikkut aningaasarsiorneq siuarsaruminarsarlugu.

Inatsisartut inatsisissaattut siunnersuut una inuiaqatigiinni aningaasarsiornikkut pisortat ingerlatsineranni annertuumik allannguuteqartitsisussaavoq. Tamannalu pitinnagu politikikkut siunnerffiiit uninngasutut oqaatigineqarsinnaasut aamma eqqarsaatigineqartariaqarput. Aalajangiiffigisassat annertuut suli naalakkersuinikkut ersernerluttumik, nalorninartumik, aamma qanoq aalajangiiniartoqarnersoq nalornissutigineqarpoq.

Kommunit kattunnerisa kingorna kommunit amerlassusaat allanngortinneqassappat? Kommunit kattunnerisa kingorna aningaasarsiornikkut siunnerfigineqartut naapertuuttumik angusaqarfiusimappat? Kommunit kattunnerisa kingorna aningaasarsiornikkut sinaakkutissat qanoq angusaqarfiunerpaasinnaanersut suli takussutissartaqartinneqanngilaq. Naak kommunit kattunnerisa kingorna akisussaaffiit annertuut Namminersorlutik Oqartussaniit kommuninut nuunneqarmissaat siunertarineqaraluartoq.

Inuit Ataqatigiit oqaaseqaat una aqutigalugu Naalakkersuisunut kaammattuutigeqqissavarput kommunit kattunnerat pillugu naliliiniviit tunngavissarissaarlunilu siunnerfeqaatigiinnissamut toraagaqarnissaq katersuuffinngortinniaqqullugu. Tamanna pissappat Inuit Ataqatigiit suleqataanissatsinnut piareersimavugut. Pisariaqarluinnarpoq kommunit kattunnerat aamma maani inersuarmi isummersoqatigiiffigissallutigu. Kommunit tassaammata inuit atugaannut qaninnerpaajullutillu toqqaannartumik sunniuteqarfiusartut.

Missingersuutit naatsorsuutillu pillugit Inatsisartut inatsisissaattut siunnersuut misissorluagaassaavoq. Maluginiakkavut naapertorlugit kommunit sisamaasut akornanni kommuneqarfik Sermersooq kisimi ersarissumik akissuteqarsimasoq takuneqarsinnaavoq. Inuit Ataqatigiit amigaatigaarput kommunit sinnerisa Inatsisartut inatsisissaat pillugu qanoq isumaqarnerisut.

Tusarniaaqqinnissaq Inuit Ataqatigiinniit kaammattuutigissavarput. Tassami Kommunit Namminersorlutillu Oqartussat missingersuutaat naatsorsuutaallu pillugit Inatsisartut inatsisissaattut annertoq ullut suliffiusut amerlagisassaangitsut periarfissaralugit tusarniaasoqarsimavoq. Kommunillu pingasut akissuteqarsimannginnerannut tamanna pissutaaratarsinnaammatt Inatsisartut ataatsimiitsitaliaanni tusarniaassutigineqaaqqinnissaa Inuit Ataqatigiinniit inassutigissavarput.

Ilanngullugu maluginiarneqartussatut tikkuarumavarput Namminersorlutik Oqartussat missingersuusiortarneq pillugu inatsisaata allannguutissai, aamma kommunit aqunneqarnerat pillugu Inatsisartut inatsisaat tunngavigalugu kommunip susassaqarfiini kommunalbestyrelsi

pisussaaffiigisai eqqarsaatigalugit inatsisiliornikkut kukkuluttortoqassanngippat kommunit suleqatigalugit misissuisoqartariaqarpoq.

Missingersuusiortarnermut naatsorsuusiortarnermullu inatsit nutaaq pisortat aningaasaqarnerannut tunngatillugu nunami anguniakkat aalajangersarpai. Namminersorlutik Oqartussat kommunillu akornanni missingersuutinik ataqatigiissarinissamut piunasaqaateqarpoq. Siunnersuut akuerineqassappat inatsisartut ataatsimiititaliaanni misissussallugu pingaaruteqarpoq kommunit aningaasarpassuarnik attartortinneqarsinnaalernissaat, aamma kommunip inuisa akilersuisussatut inatsisiliuunneqarnerat pillugu misissuilluarnissaq.

Kommunimmi aningaasarsiornikkut sunneruminarnerusut takoreerparput. Aningaasarpassuarnillu attartortoqartillugu kommunillu innuttaasa akilersuinerisa nalaanni aningaasarsiornikkut ajalusoorsinnaaneq ajornanngitsumik inuit sumiiffimmini atugaannik innarliipallassinnaalissaaq. Taamaalilluni kommunit akornanni inuit atukkamikkut assigiinngitsorujussuarnik atugassaqaqtitaalersinnaaneratt aamma periarfissarissaarnerulissaaq. Inuit Ataqtigiit tamanna mianernartortaqtikkatsigu immikkut tikkuarumavarput.

Inatsisissatut siunnersuummi naalakkersuisut siunnersuutigaat suliassap aappassaaneerseqarnissaa aatsaat ukiamut pisussanngorlugu, tamanna Inuit Ataqtigiit isumaqtigaarput. Suliassarli annertoqimmat ataatsimiititaliap peqqissaarluinnartumik misissuinissaa aamma kaammattuutigalugu.

Siunnersuut siullermeerlugu oqaaseqaat aqqutigalugu inatsisartut ataatsimiititaliaanni siunnersuut misissugassanngortipparput. Pinngitsoornani kommunit tamaasa peqataatillugit suliassaq sukumiisumik sularineqassasoq inassutigaarput. Taamatut takisuuliornata inatsisissatut siunnersuut kommunit tamarmik ersarissumik isummersorfigissagaat neriuutigalugu suliassanngorlugu ingerlateqqipparput.